



ՍՈՒՐԲ ՉԱԿՈԲ

ԱՌԱՋՆՈՐԴԱՆԻՍՏ ՄԱՅՐ Ե ԿԵՂԵՑԻ

Խաջուրաքան Ետք Խաչորի Կրակի

19 Նոյեմբեր 2023

ԸՆԹԵՐՑՈՒՄ
ԵՍԱՅԻ ՄԱՐԳԱՐԵՒԻ ԳԻՐՔԻՆ
(25.9-26.7)

Այնօրը պիտի ըսեն. «Ահաւասիկ մեր Տէր Աստուածը, որուն ապաւինած էինք: Անիկա փրկեց մեզ, որովհետեւ ի՞նքն է Տէրը որուն յուսացած էինք: Ցնծանք եւ ուրախանանք մեր փրկութեան համար»: Որովհետեւ այս լերան վրայ Աստուած մեզ պիտի պաշտպանէ, իսկ Մովաքը պիտի կոխկոտէ այնպէս՝ ինչպէս յարդը կը կոխկոտեն կամնասայլով: Այո՛, Աստուած իր ձեռքը պիտի երկարէ եւ զայն խեղճացնէ ու կորուստի մատնէ, զայն վար բերելով այն բարձունքէն որուն կը ձգտէր ան: Աստուած պիտի փլցնէ քու բարձր եւ ամուր պարիսպներդ, ո՛վ Մովաք, զանոնք գետնին հաւասարեցնելով: Այն օրը Հրէաստանի մէջ հետեւեալ երգը պիտի երգեն. «Զօրաւոր է մեր քաղաքը, որովհետեւ մեր Փրկիչը ի՞նքն է անոր պարիսպն ու պատուարը: Բացէ՛ք դռները, թող ներս գայ արդարութեան հետեւող եւ ճշմարտութիւնը պահող ժողովուրդը. այն ժողովուրդը, որ

ճշմարտութիւնը կը պաշտպանէ եւ խաղաղութիւնը կը պահպանէ: Միշտ քեզի՛ յուսացինք, Տէր, ո՛վ Աստուած, մեծ եւ յաւիտենական. դուն, որ խոնարհեցուցիր եւ վար ձգեցիր երկինքի բնակիչ հրեշտակները, պիտի կործանես նաեւ մարդոց հզօր քաղաքները եւ զանոնք գետնին պիտի հաւասարեցնես: Խոնարհներն ու հեղերը միայն պիտի բնակին այդ քաղաքներուն մէջ, եւ տնանկները պիտի երթան հոն հաստատուելու: Բարեպաշտներու ճամբան ուղիղ է, Աստուած հարթած եւ պատրաստած է անոնց ճամբան»:

ՊՕՂՈՍ ԱՌԱՔԵԱԼԻ
ՓԻԼԻՊՊԵՑԻՆԵՐՈՒՆ ԳՐԱԾ
ՆԱՄԱԿԻՆ
(1.1-11)

Պօղոս եւ Տիմոֆէոս, Քրիստոս Յիսուսի ծառաներս, կը գրենք ձեզի՛ Քրիստոս Յիսուսի միացած բոլոր հաւատացեալներուդ որ Փիլիպպէի կողմերը կը բնակիք, ինչպէս նաեւ եպիսկոպոսներուն ու սարկաւագներուն: Թող Աստուած մեր Հայրը եւ Տէրը Յիսուս Քրիստոս

շնորհք եւ խաղաղութիւն պարգևեն
ձեզի:

Ամէն անգամ որ ձեզ յիշեմ՝
գոհութիւն կը յայտնեմ իմ Աստուծոյս:
Ամէն անգամ որ ձեր բոլորին համար
կ'աղօթեմ՝ ուրախութեամբ կ'աղօթեմ,
որովհետեւ առաջին օրէն մինչեւ
հիմա ձեր մասնակցութիւնը բերիք
աւետարանչութեան գործին։ Եւ
վստահ եմ թէ Աստուած, որ այդ
բարի գործը սկսաւ ձեր մէջ, զայն
իր կատարումին պիտի հասցնէ
մինչեւ Քրիստոս Յիսուսի օրը գայ։
Իրաւունք կը համարեմ այսպէս
խորհիլ ձեր բոլորին մասին եւ ձեզ
սիրտիս մէջ ունիմ, որովհետեւ բոլորդ
ալ մասնակից եղաք ինծի վիճակուած
շնորհքին, ըլլա՛յ բանտարկութեանս
ընթացքին, ըլլա՛յ երբ ազատ վիճակով
Աւետարանը կը պաշտպանէի ու
կը հաստատէի։ Միայն Աստուած
գիտէ թէ ո՞րքան կարօտցած եմ ձեզ,
Քրիստոս Յիսուսի գորովովը։

Իմ աղօթքս է որ ձեր սէրը աւելի
եւ աւելի ածի աստուածգիտութեամբ
եւ կատարեալ դատողութեամբ,
որպէսզի կարենաք լաւը ընտրել
եւ Քրիստոս իր գալստեան օրը
ձեզ գտնէ մաքուր եւ անբասիր, եւ
Յիսուս Քրիստոսի միջոցաւ արդար
գործերով հարստացած՝ պատճառ
ըլլաք որ Աստուած փառաւորուի եւ
գովուի։

ՅԻՍՈՒՍ ՔՐԻՍՏՈՍԻ
ԱԻԵՏԱՐԱՆԷՆ
ԸՍ ՂՈՒԿԱՍԻ
(9.44-50)

Մինչ ժողովուրդը կը զարմանար
իր կատարած գործերուն վրայ,
Յիսուս աշակերտներուն դառնալով
ըսաւ. «Լա՛ւ մտիկ ըրէք եւ մի՛
մոռնաք ասիկա. մարդու Որդին պիտի
մատնուի մարդոց ձեռքը»։ Սակայն
աշակերտները չհասկցան խօսքին
իմաստը, որովհետեւ Աստուածիրենցմէ
ծածկած էր՝ որպէսզի չհասկնան։
Միւս կողմէ ալ կը վախնային իրեն
հարցնելու այս մասին։

Աշակերտները, սկսան վիճաբանիլ
թէ իրենցմէ ո՞վ է մեծը։ Յիսուս
գիտնալով անոնց մտածումը, մանուկ
մը առաւ եւ իր մօտ կանգնեցնելով
ըսաւ. «Ով որ այս մանուկը ընդունի
իմ անունովս՝ զիս ընդունած կ'ըլլայ,
եւ ով որ զիս ընդունած է, ընդունած
կ'ըլլայ զիս ղրկողը։ Որովհետեւ ով
որ ձեր մէջ ամենէն փոքրիկն է, ան
է մեծը»։

Յովհաննէս ըսաւ. «Վարդապետ,
մէկը տեսանք որ քու անունովդ դեւեր
կը հանէր եւ մենք արգիլեցինք իրեն,
որովհետեւ քու հետեւորնդներէդ չէ»։
Յիսուս ըսաւ. «Արգելք մի՛ ըլլաք իրեն.
որովհետեւ ան որ հակառակ չէ ձեզի,
կը նշանակէ թէ ձեր կողմն է»։